

古鑑齋集



國語補章

次公署



重刊國語補韋序

國語者漢世中祕古文舊書之一與左氏春秋相表裏者也七畧列之春秋家賈生箸書子長作史小戴說禮穎叔推麻皆取資焉東漢迄晉鴻生碩師每每爲此書訓釋如賈景伯解故鄭仲師王子雍二家章句虞仲翔唐子正韋弘嗣孔晁四家注並見於箸錄今惟韋注孤存唐以後左氏盛行此書獨晦柳子厚且作非國語二篇以相訾警而劉子玄造史通頗推重之以爲紀事之權輿蓋亦不祥之祥矣嘗謂尙書家之有逸周書禮家之有大

戴記春秋家之有國語不惟六籍之羽翼抑亦古文之淵極顧唐宋儒臣爲經傳疏義者屏棄弗保自宋宋公序明陶望齡而外絕少顯治國語者豈真書有通塞猶人之有祿命歟近三百年樸學昭明說經之書積若丘山逸周大戴既爲士林肄業所及治國語者亦比肩而起如劉氏台拱汪氏中董氏增齡洪氏亮吉姚氏鼐陳氏瑒王氏煦王氏念孫黃氏奭龔氏麗正汪氏遠孫陳氏奐譚氏澧俞氏樾劉氏師培凡十許家或造專書或爲條記類能闡發古義析難解疑學者苦其不能盡見而

黃氏模國語補章四卷尤屬難得書目答問雖舉其名注則云未見傳本昔王葵園祭酒刊續經解於江陰南菁書院曲園越縵二先生爲草目錄黃氏此書在焉而續經解竟遺之殆搜采未逮歟民國二十二年夏於大梁市肆見黃氏夏小正異義及此書版式與浙刊杭氏七種相類異義收入續經解傳世已廣此書爲同光以來難得之本不圖無意遇之喜不自勝適涵楚使君建牙汴水有網羅文獻之思因出資授梓依原書景刻予弟子武福鼐爲之校字竣工之日輒書所懷以爲之序黃

氏字相圃杭人與吳聖徵祭酒友善他所著有壽
花堂詩集事蹟畧見杭郡詩輯列名參校之吳清
漣諸人則祭酒之子姓也民國二十又四年八月
歲陰在姬訾日在鶉尾邵瑞彭記

國語補韋卷之一

錢唐吳清漣參校

錢唐黃模學

周語

茂正其德而厚其性

茂宋本作懋韋解懋勉也當作懋

茂正其德脩道之教也教化不行則民性薄

某氏

補正

昔我先王世后稷

史記與詩疏同今脫王字从宋本

世后稷以服事虞夏言世爲稷官是失其代數

也

史記索隱

奕世載德

賈逵曰載行也

侯衛賓服

賓服卽綏服諸侯安王則謂之綏王敬諸侯則

謂之賓

尚書疏

日祭月祀

日祭喪之朝夕奠也月祀朔日朝廟之祭也在

喪則爲朔奠

補正

犬戎樹惇

水經河水篇有樹頽水趙一清案方輿紀要曰

志云周穆王時犬戎樹惇居此有城在寧夏衛

西周涼州刺史史寧曰樹敦賀眞二城吐谷渾
之巢穴也魏書地形志朔州神武郡領殊頽縣
殊頽卽樹頽蓋語出戎方音之異耳水經注釋模案
徐廣曰樹一作欒信乎語音輕重之異其爲犬
戎嗣君名無疑矣

瞽獻典

齊召南曰左傳瞽爲詩疏引周語云瞽陳曲今
本國語作瞽獻典以孔疏證之則曲字是但古
人言詩歌不言曲言曲蓋始于此詩譜亦作曲
左傳攷證模案宋本國語曰瞽獻曲韋解曲樂曲也

俱不作典字又國語城周篇衛彪傒言飫歌少
曲韋解曲章曲也則周時已稱詩歌爲曲矣

近臣盡規

正君曰規規者正圓之器也

厲王說榮夷公

榮夷公名終

呂氏春秋當染篇

將導利而布之上下者也

布之上下謂上自后王君公下及士農工商各

有應享之利也

補正

自今至于初吉

黃震曰上文先立春九日告稷則初吉者孟春

之初也注引詩爲二月初吉合攷

日鈔

家南雷先

生宗義曰先時注云先立春日也初吉朔日也

自今至于初吉自先時至于立春也則初吉之

爲立春明矣以上文農祥晨正日月底于天廟

言之則是寅月之朔日皆謂之立春也

文定

及期鬱人薦鬯犧人薦醴王裸鬯饗醴乃行

王裸鬯祭藉田之神也饗醴乃自饗知然者耕

藉宜有祭而王自饗不應用裸

補正

鄭氏周禮注

曰醴今甜酒

廩于藉東南鍾而藏之而時布之于農

帝藉所收祭祀不能盡用故布之于農使爲種

勸耕

補正

料民于太原

趙佑曰宣王時太原久爲戎地且屬晉詎鎬京
遠何從而料民于此知此太原只是近在京周
偶與晉陽者同名耳綱鑑正史約以料民太原

卽今固原州

詩細

司民協孤終司商協名姓司徒協旅司寇協姦牧
協職工協革場協入廩協出

司商疑卽司市也商賈行居無常故登其名姓而協之知然者司徒協旅案上地中地下地以起徒役則農民之數具矣牧卽周官所謂藪牧養蕃鳥獸也場卽園圃毓草木也牧協職場協入則雜民之數具矣工協革則百工之數具矣廩協出則府史胥徒奚隸之數具矣司寇協姦則刑人罷士之數具矣凡民之數皆具不宜獨遺商賈且司商之名別無所見舊說人之始生吹律合之以定其姓名無所據義亦未安士之數司士掌之此言民數故不及司士而司民協

孤終則統四民之籍矣牧曰職者馬有圉牛有
牧各有職事以服事其上也工曰革者老疾退
減少壯增入更易無常也

補正

幽王二年西周三川皆震

今本二作三韋注三川
涇渭洛也洛譌作汭

伯陽父

唐固曰伯陽父周柱下史老子也

史記

模案水

經注渭水篇有伯陽谷伯陽水伯陽城伯陽川
酈道元曰蓋李耳西入往逕所由故山原畎谷
往往播其名焉據此知老子字伯陽也

陰迫而不能烝

迫今本作遁

昔伊洛竭而夏亡

竹書夏帝癸十年地震伊洛竭

鄭伯將王自圉門入

宋本韋注有圉門南門也五字今本脫

融降于崇山

崇山嵩山也

回祿信于聆隧

竹書帝癸三十年冬聆隧災按左傳疏引作黔

隧說文作聆遂闕

檇杙次于丕山

檇杙狀似虎毫長二尺人面虎足豬牙尾長丈

八尺能鬪不退

文十八年左傳疏

羅願曰檇杙好鬪至

死不卻西荒中獸也荒中張捕之復黠逆知之

一名倒壽

爾雅翼

模案湯始征誅故鬪獸見與

夷羊在牧

竹書殷紂四十八年夷羊見徐文靖案周書度

邑解王曰嗚呼旦惟天不享于殷發之未生至

于今六十年夷羊在牧飛鴻徧野不知夷羊何

物史記貨殖傳其民羯羴不均徐廣曰羴音兕

一音囚凡反皆健羊名當卽是夷羊

竹書統箋

鸞鷟鳴于岐山

竹書殷王文丁二年有鳳集于岐山沈約注周
文王元年也

杜伯射王子鎬

徐文靖案周語云杜伯射王子鎬韋注鎬鎬京

也引周春秋謂杜伯射王子圃田與國語異

竹書

統箋模案周春秋今惟見顏介冤魂志中其述杜

伯事殊鄙誕攷墨子云昔周宣王殺其臣杜伯

而不辜杜伯曰吾君殺我而不辜若以死者爲

無知則止矣若死而有知不出三年必死吾君

之期三年宣王合諸侯而田于圃車數百乘從